


Maladers e Calfreisen a l'entrada dal Scanvetg

■ Il Scanvetg è ina vallada che s'extenda tranter Cuira ed Arosa sur ina lunghezza da radund 30 km vias u viafiers. Politicamain è la gronda part da las anteriuras vischnancas sa colliada il 2013 a la vischnanca da vallada Arosa. Las excepziuns furman Maladers en il Scanvetg Dadora (orientà vers Cuira) e la vischnanca da Tschierscha-Prada situada da la vart sanestra da la val (che fa part dal circol Curvalda). Il LIR preschenta oz ils artitgels da survista «Scanvetg» e «Plessur» e sa ferma silsunter a Maladers e Calfraisa, ils dus abitadis situads da vart dretga a l'entrada da la vallada.

Scanvetg / Schanfigg

Vallada e circol dal district Plessur. La Val Scanvetg, periclitada fermamain da bovas, cumpiglia l'intschess idrografic da la Plessur che s'extenda da sias funtaunas fin a Sassal al cunfin da la citad da Cuira. Ella vegn cunfinada da las chadainas da muntognas dal Hochwang, dal Weissfluh e dal Rothorn. Cun excepziun da Molinis sa chattan tut ils vitgs dal Scanvetg sin terrassas situadas aut sur il fund da la val. Quels dal Scanvetg Dadora e dal Scanvetg Central èn construids a mantun u lung la via, entant che la part interna da la val consista d'acclaus sparpagliads. Ils abitadis da Prada e Tschierscha, situads da la vart sanestra da la val, appartegnan dapi il 1851 politicamain al circol da Curvalda e furman dapi il 2009 la vischnanca Tschierscha-Prada. Arosa (fracziun da la vischnanca da Tavau fin il 1851) ed ils abitadis da la vart dretga da la val (Pralung, Peist, Molinis, Son Peder, Pagig, Castiel, Lüen, Calfraisa e Maladers) fan part dal circol dal Scanvetg e furman – cun excepziun da Maladers – dapi il 2013 la vischnanca da vallada Arosa. 765 in *Scannavico* (copia dal «Testament da Tello»). Dumber d'abitants dal circol dal Scanvetg en si'extensiu actuala: 1803 1129; 1850 1477; 1900 2382; 1950 4217; 2000 4415.

A Maladers ed a Castiel èn attestadas culegnas preistoricas che stattan eventualmain en connex cun in'antieriura via da sauma che manava da Cuira sur il Pass da la Striera en la Val da la Landwasser. A Calfraisa han ins scuvert ina fossa dal temp roman tardiv. Il document da fundaziun da Lüen dal 1084, en il qual ils libers vischins rumantschs han regalà lur baselgia cun tut ils bains a l'investgieu da Cuira, cumprova che l'urbanisaziun dal Scanvetg Central era gia terminada en il temp autmedieval. La regiun era gia fermamain colonisada da quel temp e la glieud cultivava ils ers (era chonv), pratigava la pumicultura e l'allevament da nursas. La part interna da la val è vegnida colonisada a partir dal 1273 l'emprim, e sin iniziativa dal chapitel catedral da S. Gliezi/Cuira, davent da Peist. Enturn il 1300 èn sa domiciliads Gualers da lingua tudestga a Sapiun, Fondei, Arosa e Pralung ed han colonisà Prada davent da Pralung. Tschierscha era orientà pli ferm vers la regiun bilingua da Curvalda ed era sutmess als signurs feudals e giudizials da quella. A Maladers ha la dretgira d'avugadia da Cuira occupà la giurisdicziun criminala fin en il temp medieval tardiv. La suveranità territoriala sur il Scanvetg han



Sguard dal Weisshorn (Arosa) sur il Scanvetg.

FOTO: JOUJOU / PIXELIO

exercità ils vasals episcopals: ils de Vaz fin il 1338, alura ils Werdenbergs, 1363–1436 ils Toggenburgs, suandads dals Montforts il 1437, dals Matschs il 1471 ed a partir dal 1479 da l'Austria. Ils signurs feudals principals èn stadas las claustras da Faveras, Curvalda, S. Gliezi/Cuira e S. Nicolai/Cuira sco era l'investgieu ed il chapitel catedral. En il Scanvetg residiavan era numerus signurs cun possess da turs e chastels (oravant tut da la vart dretga da la val). Gia l'onn 831 è attestada a Son Peder la veglia baselgia da la val. Pli tard èn vegnidas fundadas las trais plaivs da Son Peder, Castiel e Pralung. En ils onns 1530 ha la plipart da las vischnancas dal Scanvetg adoptà la cretta reformada, entant che Tschierscha ha fatg quel pass pir suenter il 1550, Maladers pir suenter il 1635. Il cumin da Son Peder (Scanvetg Dadora) è sortì da la fusiuin dals vischinadis sutmess a la medema dretgira criminala. Il 1436 ha el participà cun il cumin da Pralung, ch'è sa constituì en ils onns 1400 sco communitad dals colonists da lingua tudestga en il Scanvetg Dadens (senza Arosa, ma cun Prada), a la fundaziun da la Lia da las Diesch Dretgiras. Quests dus cumins furmavan la dretgira auta dal Scanvetg. Cuntrari al Scanvetg Dadora (da quel temp anc da lingua rumantscha) possedeve Pralung in'atgna dretgira bassa cun libra tscherna dal landamma. Il 1652 ha il Scanvetg cumprà ora ils dretgs signurils, il 1657 il dretgs feudals episcopals. Durant ils Scumbigls grischuns (1622) èn vegnidas incendiadas tut las vischnancas dal Scanvetg da Maladers fin a Peist. Ils abitants dal Scanvetg pratigavan surtut l'allevament da muvel e la cultivaziun dad ers. Ad Arosa (1850 56 abitants; 1930 3466) è sa sviluppà in ferm turissem d'enviern e da stad grazia a l'avertura da la via charrabla da Cuira a Pralung (1875–91) e da la Viafier Cuira–Arosa (1914). Il turissem vegn promovì era a Tschierscha, Pralung e Son Peder. En las autras vischnancas predominava il 2000

anc adina il sectur primar avant il terziar. Maladers è daventà ina vischnanca aglomerada da Cuira. Jürg Simonett

Plessur

Flum e district dal Grischun. Il flum è documentà a la fin dal 12avel tschientaner sco *Plassura*. El nascha sin il territori d'Arosa, unescha a Pralung ils auals da Sapiun e Fondei, percurra il Scanvetg e sbucca a Cuira en il Rain. Ses intschess, periclità fermamain da bovas e sbuvaditschs, vegn cunfinà dal Hochwang, da la Weissfluh e dal Rothorn. Gia en il temp medieval avev'ins devì dus auals sur la citad da Cuira per producir, cun agid da mulins, energia per manaschis. Fin a la correziun il 1765 è la citad da Cuira savens vegnida inundada da la Plessur. Fin il 1968 han ins flottà laina dals gauds dal Scanvetg Dadora sin la Plessur fin al Sand a Cuira. Il 1914 è vegnì erigì il stgalim Molinis-Lüen da l'Ovra idraulica Lüen, il 1947 il stgalim Lüen-Cuira/Sand.

Dapi il 1851 exista il district da la Plessur, ina creaziun artificziala senza antecessurs istorics; quest district sa cumpona dals circuls da Cuira, Curvalda e Scanvetg ch'han remplazzà da lur vart il 1851 ils vegls cumins da Cuira, Curvalda, Son Peder e Pralung. La nova repartiziun dals districts dal 2001 n'ha purtà naginas midadas territorialas a quest district. Jürg Simonett

Maladers

Vischnanca politica, circol Scanvetg, district Plessur. Vitg a mantun situà a l'entrada dal Scanvetg, cun ils acclaus da Sax e Brandacker. 1156 *de Maladru*. 1803 120 abitants; 1850 253; 1900 341; 1950 448; 2000 506. In abitadi dal temp preistoric e protoistoric è attestà sin il Tumihügel. L'attribuziun da la baselgia da S. Sievi, menziunada il 841, n'è betg segira; la baselgia da S. Desideri è documentada il 1150. En il 12avel tschientaner è menziunada ina migiuria dal chapitel catedral da Cuira, ad-

ministrada probablmain dals signurs von Maladers. Las claustras da S. Nicolai/Cuira, S. Gliezi/Cuira e Curvalda possedevan qua bains. Fin viaden il temp medieval tardiv exercitava la dretgira prefectuala da Cuira la giurisdicziun auta. A partir dal 1487 èn menziunads plevons ed il 1635 è Maladers aderì a la cretta reformada. La lingua rumantscha è sparida enturn il 1570. Las circostanzas dal passagi da Maladers da la sfera d'influenza da Cuira a quella dal cumin da Son Peder n'èn betg cleras. Il 1652 èn vegnids cumprads ora ils dretgs signurils austriacs, il 1657 ils dretgs feudals episcopals. Suenter la naturalisaziun imponida als cumins (1850), è sa formada era ina plaiv catolica ch'ha costruì ina chaplutta il 1923. Dal 1875 al 1877 è vegnida realisada la via charrabla sut il vitg. A l'entschatta dal 21avel tschientaner è Maladers ina vischnanca d'aglomeraziun da Cuira. Jürg Simonett

Calfreisen (Calfraisa)

Antieriura vischnanca politica, circol Scanvetg, district Plessur; dapi il 2013 part da la vischnanca da vallada Arosa. Vitg serrà sin la spunda nord dal Scanvetg. 1156 *Caureisene*, tudestg Calfreisen (uffizial). 1808 57 abitants; 1850 98; 1900 58; 1950 60; 1980 34; 2000 45. Chat d'ina fossa dal temp roman tardiv en la chavorgia da Calfraisa. La gronda part dal Scanvetg Central è vegnida colonisada ed urbanisada fin la fin dal 12avel tschientaner. Il feud episcopal è passà dals signurs de Vaz als de Werdenberg (1338), alura in'emprima giada als de Toggenburg (1363). Ils signurs da Calfraisa, che residiavan sin il chastè cun il medem num (menziunà il 1231), paran d'avair exequì ils dretgs signurils. Il 1386 residiavan là ils von (era: ab) Unterwegen, suenter il 1428 ils Sprechers ch'han probablmain dà al chastè il num Bernegg. Sco vischinadi dal cumin da Son Peder è Calfraisa s'unì cun la Lia da las Diesch Dretgiras il 1436. La suveranità, acquistada

dals signurs von Montfort il 1437, è pasada als von Matsch (1471), alura a l'Austria (1479). Il 1652 è sa liberada la vischnanca da Calfraisa dals dretgs feudals austriacs, il 1657 era da quels episcopals. Anc il 1570 era Calfraisa ina vischnanca rumantscha, dapi alura è ella vegnida germanisada successivamain. Ecclesiasticamain appartegna Calfraisa a Castiel. La via charrabla dal Scanvetg sut il vitg da Calfraisa è vegnida realisada il 1875–77, l'access da Calfraisa a quella il 1924–25. Las funtaunas d'entrada las pli impurtantas a Calfraisa èn l'allevament da muvel e l'agricultura (2000 36% da las piazzas da lavur). Meglieraziun generala dal 1982–93. La vischnanca n'ha ni baselgia ni scola ni butia ni ustaria. Jürg Simonett

Bernegg

Ruina d'in chastè situada sin in grugn al sid da Calfraisa en il Scanvetg. Restanzas d'in edifiz d'abitat rectangular a quatter plauns. In anteriur mir da tschinta ed in edifiz d'economia sa chattavan probablmain al lieu d'edifiz vischins. Il palazi-fortezza datescha probablmain dal 13avel tschientaner. Sedia dals signurs von Calfreisen, en il 14avel tschientaner da quels von Unterwegen. En il 15avel tschientaner è il chastè da Calfraisa passà als Sprechers von Bernegg, dals quals el ha survegnì il num. Il chastè era gia en ruina enturn il 1550. Maria-Letizia Boscardin

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.



Calfraisa cun la ruina da Bernegg. Davosvart il Montalin e la chadaina da Hochwang.



Baselgia reformada da Maladers.

MALETG DAL 1870